

坤輿典第四十四卷

輿圖部彙考二

周

周制大司徒以土地人民之數制邦國之封疆而夏官職方氏辨九州之國按周禮地官大司徒之職掌建邦之土地之圖與其人民之數以佐王安擾邦國

司義

鄭康成曰土地之圖若今司空郡

國輿地圖

以天下土地之圖周知九州之地域廣輪之數鄭鏐曰馬氏云東西爲廣南北爲輪廣者指其橫言輪者指其從言王制言東西長而南北短惟其長故謂之廣惟其短故謂之輪以圖而攷其廣輪則或千里而遠或千里而近舟車所通人迹所至之地皆可數計矣

辨其山林川澤丘陵墳衍原隰之名物而辨其邦國都鄙之數制其畿疆而溝封之鄭鏐曰畿外之地可建邦國畿內之地可建都鄙其數則如王制畿內九十三國畿外一州二百一十國不辨其數則地不足以容其國而地至於不足國不可以居其地而國至於有餘林氏曰制邦國之

古學匯纂卷之九
畿疆以地理而制之有五百里至百里之別制都鄙之畿疆以室數而別之有上地至下地之別
鄭康成曰溝穿地爲阻固也封起土界也

設其社稷之壇而樹之田主各以其野之所宜木遂以名其社與其野 鄭康成曰社稷后土及田
正之神

夏官職方氏中大夫四人下大夫八人中士十有六人府四人史十有六人胥十有六人徒百有六
十人 鄭康成曰職主也主四方之職貢者職方氏主四方官之長 陳君舉曰職方掌天下之圖
而隸司馬者謹之也戰國策士每言闕周室則可案圖籍以爭天下故蕭何入秦獨收圖籍以此
自漢守之司空竇以泄布當時如江都淮南諸王皆案輿地謀變而王鳳亦云太史公書有地形
阨塞不宜在諸侯王然則古圖雖司徒掌之而藏在司馬祕不得見先王所以弭奸消患者其慮
遠哉 李嘉會曰職方無上士下士所掌五夷八蠻與天下侯國之衆職大且尊如漢典屬國也
掌天下之圖以掌天下之地辨其邦國都鄙四夷八蠻七閩九貉五戎六狄之人民與其財用九穀
六畜之數要周知其利害 王氏曰掌天下之圖以掌天下之地則所掌非特圖也又掌其地焉

鄭鐸曰職方所掌地圖與大司徒天下土地之圖一也然大司徒所掌者王朝之圖要知中國及九州可以建國分封之地且將以辨土宜而施教也職方所掌則兼中國要知其上之所有不止國中分封之地而已大司馬將以施九畿之政職必本是圖故不屬於大司徒而屬於司馬後世所謂司空輿地圖光武嘗披之以問鄧禹者是也 易氏曰言邦國則王畿之外五等諸侯之國言都鄙則王畿之內三等食采之地此二者舉中國言之 鄭鐸曰四八七九五六者其種類分別多矣周之所服者其數止此武王克商通道於九夷八蠻而周明堂位有九夷八蠻五狄六戎之國各列于門外其數與此或差者意當時版圖入於職方者如此耳 王氏詳說曰明堂位言九夷八蠻五狄六狄與職方不同以爾雅攷之明堂位爲正李巡注爾雅以元黃樂浪等爲九種之夷天竺呶首竿爲八種之蠻繞夷戎史等爲六種之戎月支穢貊等爲五種之狄是也賈氏以四夷爲四方之夷總名以九貉爲東方九夷以七閩爲南方八蠻其說得矣但此五戎當爲六字六狄當爲五字 陳君舉曰周天下方七千里大槩與四夷八蠻七閩九貉五戎六狄并言之其實諸侯封守不如是之廣也以王制攷之西不盡流沙南不盡衡山東不盡東海北不盡常山凡

四海之內絕長補短方三千里是天子壤地之實其間亦有戎狄錯居如魯徐戎之類是也又荆楚之地在江漢之間自楚以南悉爲百越之地而衡山在楚之極南安在天子之封內耶舉一隅則四海可知 鄭鑄曰辨其民則以廣谷大川異制民生其間異俗飲食異器械異用辨其財用則以布帛財貨所資者不同辨其九穀則以土之所生者或四種五種所宜各不同辨其六畜則以物之所產者或四擾三擾所性各不同故也 易氏曰此數者職方氏皆以圖而攷其數復以數而總其要又以數要而周知其利害利如土宜土化之類凡利於民者害如地厯之類凡害於民者職方氏既已周知而歷數然後大司馬以九畿之籍而施邦國之政職使九州之國各共其職以任其政無有不同之貫利此其官所以列于大司馬之屬而謂之職方氏

乃辨九州之國使同貫利 鄭鑄曰自中國以至夷狄兼舉而周知之矣乃若國之有九州爲五政之所加七賦之所養王者所治之區域也必使貫無不同則九州共貫利無不同則四海蒙利

劉執中曰四方人民好惡之不同則其風俗有善惡矣四方財用有無之不等則其衣食有厚薄矣必周知其利害貫而通之使有無之相易善惡之相濟一天下之財用養天下之人民俾同享

其利焉故曰使同貫利

東南曰揚州 賈氏曰自此以下陳九州之事總爲三道先從南起周改禹貢以徐梁二州合之於雍青分冀州地以爲幽并東南曰揚州次正南曰荊州周之西南不置州統屬雍州卽次河南曰豫州爲一道也次正東曰青州次河東曰兗州次正西曰雍州爲二道又次東北曰幽州次河內曰冀州次正北曰并州爲三道 易氏曰禹貢揚州之域東距海北據淮故曰淮海惟揚州殷人以淮入徐故揚州止謂之江南周人復以淮入揚而循禹之舊不言淮海而曰東南者變禹貢之文也

其山鎮曰會稽 王昭禹曰九州之山皆言其山鎮者蓋國主山川而保之山之大者可以鎮安其地也 易氏曰稽計也吳越春秋曰禹巡狩天下會計修國之道以會稽名山漢志屬會稽之山陰縣唐爲越州會稽縣山在州東南二十里今州爲紹興府

其澤藪曰具區 王昭禹曰水所鍾曰澤草所生曰藪 易氏曰孔安國會稽郡具區澤在西古文以爲震澤是吳南太湖名唐屬蘇州今爲平江府

其川三江 王昭禹曰以達水者謂之川 易氏曰書曰三江既入震澤底定震澤太湖也堯時洪水泛濫有此水勢與周之職方不同而孔安國乃云江至彭蠡分爲三入於震澤是求合乎禹貢之說似矣然書以江漢所匯之處爲彭蠡澤在今江州湖口縣界江至湖口合三爲一未聞其分一爲三也又太湖在蘇湖常三州之間自不與江水相通彭蠡所匯之江何從而入之耶班固知大江與震澤不相通又附會爲之說曰南江自震澤東南入海中江自蕪湖東至陽羨入海北江自毗陵北東入海毗陵今常州也今以大江之在毗陵北東者以當北江正與書合者謂南江自震澤東南入海則非經之所謂南江矣又謂蕪湖有水東至陽羨以爲中江其失爲特甚陽羨今常州宜興也與建康之溧陽接境兩境中高水皆東西分流其東流而下陽羨者固可通海而蕪湖之水乃皆西北流北向以入於江初非上陽羨也其爲誤有如此者至桑欽所言北江與固同其敘南江中江則其謬滋甚史記正義又曰太湖旁有三水遂以爲三江之證皆非禹之所謂三江也然則經之三江將孰從乎以經證經自有明文漢水出於嶓冢者爲北江江水出於岷山者爲中江既有北江又有中江則必有南江近代儒者謂南江自豫章而入於彭蠡此說誠可信據

此則三江已合於荆揚之間至揚州末流復言三江豈果分爲三乎揚瀕海爲支川之下流必言三江所以紀水之所入也知此則知三江震澤之說黃氏曰韋昭以松江浙江浦陽江爲三江郭景純以岷江松江浙江爲三江大抵閩浙去海近水多自爲瀆入海俗皆稱爲江偶有三焉則爲三江其實皆小水非禹貢職方之三江酈道元所謂其柝相亂者也由此言之氾蠡三江當爲浙錢清剡子胥三江則郭景純說猶近之蓋岷江自彭蠡而下合池宣昇潤眞揚諸州水在其北松江合湖秀蘇常諸州水居其中浙江合衢婺徽嚴杭越諸州水在其南此爲全吳地域也禹貢職方三江爲揚州川蓋江漢彭蠡之已合者也江漢彭蠡已合而猶曰三江者同流合派不相雜襲皆能自達於海

其浸五湖王昭禹曰以水浸田謂之浸自揚之五湖以至并之涑易皆其地之水可引以浸灌也黃氏曰五湖又多異說虞翻曰是湖有五道故曰五湖今湖旁港瀆不止於五其說非也韋昭曰五湖今太湖方圓五百里故爲五湖具區以其號爲澤藪而又以其方圓里數爲浸亦非也張守節曰太湖東岸五灣爲五湖曰菱湖游湖莫湖貢湖胥湖其說或然今蘇常間陂湖與太湖連接

者尙多何止五也酈道元因水經南江東北爲長瀆歷河口乃謂江東注具區謂之五湖口旣甚謬誤又引郭景純江賦謂江水經緯五湖而包注太湖觀其所指五湖雖不可盡知而太湖在今毗陵與岷江不通則所謂經緯五湖者皆不然也酈本漢志與水經故謂南江東注具區今饒歙諸州自彭蠡右出直抵江其西爲池太平宣建康其東爲湖蘇常潤西水皆入江東水皆入太湖江豈能越山而注太湖乎大抵職方川則其地自高而下水之所流行也浸則地勢平衍水之所停涵也地有浸則肥美播種所宜而又沮洳足爲險固揚州自古爲澤國湖雖必當有五者應此數自舊說多如此則是失其傳久矣不必强牽合也 易氏曰嘗攷經意旣謂五湖不止一湖今如丹陽彭蠡以湖名者甚衆皆在古揚州恐別有五湖之名但經無明文不可臆說 李圖曰五湖彭蠡洞庭巢湖太湖鑑湖 柯山曰五湖太湖湖州射陽湖楚州青草湖岳州丹陽湖潤州洞庭湖洪州國語越語下曰戰於五湖注曰今太湖也

其利金錫竹箭 鄭康成曰錫鑛也箭篠也 易氏曰考工記曰吳越之金錫爾雅曰會稽之竹箭禹貢於揚州亦曰唯金三品又言璫琨篠簜信乎爲揚州之地利

其民二男五女 愚案司民掌登萬民之數自生齒以上皆書於版異其男女及大司徒掌建邦之土地之圖與其人民之數則知五男二女與一男二女二男三女之差是職方總九州之圖而辨其人民當時版籍通以一州計之大約爲此數及世變既久不無升降損益也或以陰不生於陰而生於陽故揚乃多女若然則幽并北陰方也何女之多於男乎

其畜宜鳥獸

鄭康成曰鳥獸孔雀鸞鵠犀象之屬

易氏曰此等畜多產於南方亦時見有之

其穀宜稻

易氏曰稻生於水澤之地經言稼下地是已揚州居東南之極及支川下流之所歸厥

土爲塗泥爲沮洳故其穀宜稻

正南曰荊州

易氏曰禹貢荊及衡陽惟荊州殷之荊州南不言衡陽循禹之舊也其北境則曰漢

南以地志攷之荊山在南郡臨沮縣卽今荊門軍當陽縣之地漢水又在其北正屬襄陽言漢南則殷之荊州實跨荊山之北至周復以荊門之北屬豫復禹封域以荊及衡陽爲荊州荊山卽南條衡山卽南岳皆在正南之地故曰正南

其山鎮曰衡山

易氏曰漢志長沙國湘南縣衡山在東南唐屬衡州衡陽縣本酃縣地要之衡山

連亙數邑凡酈縣之東北以至湘南縣之東南則皆衡山也

其澤藪曰雲夢

易氏曰漢志華容縣有雲夢澤在南然司馬相如言雲夢澤方八九百里則雲夢

非止一澤隨所在而爲之名左傳定公四年楚子涉睢濟江入於雲中則知在江之北者爲雲又昭公三年楚享鄭伯曰江南之夢則知在江之南者爲夢禹貢言雲土夢作父蓋南北高下不等故江北之雲方見土而江南之夢已作父其勢然也 黃氏曰雲夢跨江南北今荆南岳州界

其川江漢

黃氏曰江水自夷陵而下爲州界東流會于彭蠡漢水自房陵以下爲州界東南至漢

陽入江

易氏曰漢志蜀郡湔氐道岷山在西徼外江水所出今攷唐元和志則岷山近在茂州

而江源遠出西徼在松州之境按松州交川縣江源鎮江水之迹始見於此南流至翼州翼水縣又南流至茂州汶山縣汶山卽岷山禹導江所始之地又南流至成都府成都縣有沱江鎮禹貢東別爲沱是也又西南流至眉州通義縣又南流至戎州犍道縣今爲敘州宜賓縣又東流至瀘州瀘川縣又東流至渝州巴縣又東流至涪州涪陵縣又東流至忠州臨江縣又東流至萬州南浦縣又東流至夔州奉節縣又東流至歸州秭歸縣又東流至峽州夷陵縣又東流至江陵府江

陵縣又東流入澧州界卽禹貢東至于澧之地至岳州巴陵縣有洞庭湖卽禹貢九江水經云九江在長沙下雋縣正其地也又東陵卽巴陵江水至此自東而迤北至鄂州江夏縣又東流至江州潯陽縣今爲德化縣有彭蠡澤卽禹貢江漢匯澤之地又東北流至池州秋浦縣今爲貴池縣又東北流至潤州丹徒縣州今爲鎮江府北對揚州江都乃漢志所謂東至江都入海者也漢志不知漢水所自誤認蟠冢山之西嘉陵江爲西漢水與禹貢漾漢大異考唐元和志興元府金華縣今爲鎮隸三泉縣蟠冢山在縣西三十里漾水所出東流至洋州興道縣又東流至金州西城縣又東流至均州武當縣有滄浪州卽禹貢滄浪之水又東流至襄陽府襄陽縣又東流至鄂州長壽縣又東南流至復州竟陵縣今爲景陵縣有滲參水卽禹貢三澨也又東南流至沔州漢陽縣今縣爲漢陽軍有大別山卽禹貢至於大別以入於江之地禹貢所記江漢皆發源於梁州周禮不載梁州山川故至荊州而後言其川江漢江自今歸州之秭歸縣以至鄂州之武昌縣凡一千四百餘里漢江自今均州之武當縣以至漢陽縣凡一千四百餘里皆荊州之地江漢分流于其間至是合流詩曰滔滔江漢南國之紀是也王昭禹曰卽禹貢荊州所謂江漢朝

宗于海

其浸潁湛

杜氏曰湛讀當爲人名湛之湛湛或爲淮

黃氏曰案今潁水出河南登封隅乾山東

南流至潁州潁上縣入淮鄭言宜屬豫者據禹貢也然周人畫地當有所更革矣又案酈道元注水經湛水出潁縣北魚齒山西北東南流歷魚齒山下爲湛浦春秋楚公子格與晉戰於湛阪是也湛水東入汝周禮荆浸潁湛康成云未聞偶不照此酈氏之所考據也案今汝州魯山縣漢潁縣魚齒山在龍興縣連接梁縣界是則周荊州界自隨包唐鄧東北至汝潁與豫分界而荆牧治宛宣王封申伯 易氏曰左氏傳昭元年王使劉定公勞趙孟于潁杜氏謂潁水出陽城縣案漢志縣屬潁川郡卽今河南府潁陽縣又襄十六年楚公子格帥師及晉師戰于湛阪杜氏謂襄城昆陽縣北有湛水東入汝案地志襄城卽今汝州之襄城縣昆陽故城今在汝州之葉縣已上二者皆古豫州之地經以爲荊州之浸必有脫誤處

其利丹銀齒草

鄭康成曰齒象齒也革犀兕革也

易氏曰禹貢荊州言礪砥磬丹惟金三品羽

毛齒草其地利古今然也然荊州亦言金與簠簋則未嘗無金錫竹箭揚州亦言齒草及惟金三

品則未嘗無丹銀齒革特以其地產之多者言之

其民一男二女其畜宜鳥獸其穀宜稻

河南曰豫州 易氏曰禹貢荊河惟豫州其封在大河之南南條荊山之北故曰荊河殷之豫州則南境距漢北境接河故曰河南周人於豫州亦曰河南而南境則仍禹貢之舊不曰荊河互文以見也

其山鎮曰華山 易氏曰漢志京兆尹華陰縣大華山在南後漢華陰屬弘農郡唐及今爲華陽縣其澤藪曰圃田 易氏曰漢志河南郡中牟縣圃田澤在西唐以縣屬鄭州今屬開封府圃田澤一名原圃 黃氏曰今鄭州管城縣

其川滎洛 易氏曰禹貢導沅水東流爲濟入于河溢爲滎厥後濟不溢河滎澤遂枯漢志河南郡雖有滎澤縣而不言滎澤唐元和志於鄭州滎陽縣云縣西北四里有故瀆恐未必然蓋水北爲陽縣當在澤北不應澤在縣北也漢志弘農郡上洛縣洛水出冢嶺山東北至鞏入河又盧氏縣熊耳山在東禹導洛始此而洛水實出於上洛之冢嶺山今攷之唐商州洛南縣冢嶺山在縣南

古
七十里洛水所出也又東流至本州之上洛縣又東流至虢州盧氏縣界熊耳山在縣南五十里
又東流至河南府之鞏縣會伊瀍澗之水以入於河

其浸波澁 易氏曰鄭康成曰波讀爲蟠孔安國言禹貢有播水無波水音與播同古字從山從番
讀爲蟠冢之蟠康成誠有所見而然爾雅云水自洛出爲波度其地其盧氏鞏縣之間卽今商虢
州河南府之地左氏傳莊四年楚令尹鬬析莫敖屈重除道梁澁營軍臨隨杜氏以爲澁水在義
陽厥縣西東南入鄆水義陽卽今信陽軍之西去隨甚近唐志隨州隨縣澁水出縣西四十里此
正古豫州之地鄭康成乃謂澁宜屬荊州在此非也蓋漢人誤以南陽郡爲荊州不知古荊在荊
山之南康成徇漢地志之說誤矣 黃氏曰案注水經有波水出魯陽縣霍陽西大嶺東谷俗謂
之歇馬嶺卽應劭所謂孤山波水所出者水南流入澁杜祐通典曰此謂豫浸之波魯陽今魯山
縣霍陽山在今梁縣俗稱峴山注水經澁水出隨州隨縣黃山南南流入波案職方諸浸多相接
而豫浸波澁源委殊異又相去遠而馬融廣成澤頌亦曰浸以波澁波近廣成澤澁則遠矣不知
何以自古聯稱周職方湛爲荆浸波爲豫浸則二州分今臨汝爲界澁爲豫浸則豫西界抵今漢

東故樂史實字記隨州虞周爲荆豫二州之域鄭以漢宜在荆者或未攷也

其利林漆絲枲 鄭康成曰林竹木也 王昭禹曰禹貢豫之厥貢漆絲紵則林漆絲枲固豫之所產也

其民二男三女其畜宜六擾其穀宜五種 鄭康成曰六擾馬牛羊豕犬鷄五種黍稷菽麥稻 李嘉會曰豫州土地平曠尤宜六擾五種非無他鳥獸不足稱也

正東曰青州 易氏曰禹貢有青有兗有徐殷并青於徐而徐兼揚州之淮故江南曰揚州周復以淮歸揚而并徐於青正在畿東故曰正東

其山鎮曰沂山 易氏曰唐沂州沂水縣本漢東莞縣屬瑯琊郡沂山在縣北一百二十四里 賈氏曰地志沂水出太山蓋縣禹貢沂水在徐州在青州者周以禹貢徐州地爲青故也

其澤藪曰望諸 黃氏曰望諸孟諸也在應天府虞城縣淮水流至今宿泗間爲青界東至楚州鹽城縣入海禹貢徐揚以淮爲界北徐南揚泗水出兗州沂水出奉符新泰縣界之艾山南至淮揚下邳澚入泗沭水出祈山東南流至宿遷縣入泗淮沂沭禹貢皆屬徐州周廢徐入青故皆屬青

孟諸屬豫州青又斗入豫界矣周齊爲青牧太公始都營丘故城在今濰州昌樂縣宣王時齊遷臨淄烝民詩仲山甫徂齊城彼東方是也 易氏曰唐宋州虞城縣知屬沼國今屬南京應天府

孟諸澤西北十里俗號盟諸故書謂之孟諸周禮謂之望諸漢志謂之盟諸史記謂之盟都其實一也

其川淮泗 易氏曰禹貢導淮自桐柏漢志南陽郡平氏縣桐柏大復山在東南唐以其地爲桐柏縣屬唐州淮水所出東流至蔡州之真陽又至申州之義陽縣今爲信陽軍信陽縣又東流至光州主城縣又東北流至濠州招信縣今屬泗州本漢臨淮郡淮陵縣地乃古徐州之域卽漢志所謂淮至淮陵入海者也又東北經楚州之盱眙縣今爲盱眙軍與泗州隔淮相對又至楚州山陽縣入海漢志濟陰郡乘氏縣泗水東南至睢陵入淮此孔安國引以證禹貢者漢乘氏屬濟陰郡唐以郡爲曹州今爲興仁府縣屬焉睢陵卽今泗州招信縣之北境然漢志所載自有兩泗水其一卽自此乘氏至毗陵入淮者又一泗水出魯國辨縣西南至方與入沛唐元和志辨與方與皆在兗州今襲慶府泗水縣東陪尾山泗水出焉其源有四西南流至本州曲阜縣北分爲二流北